

四庫全書

集部

欽定四庫全書

集部

唐詩紀事卷八

六至

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚熾

膳錄貢生臣李璜

欽定四庫全書

唐詩紀事卷六

宋 計敏夫 撰

上官儀

郭正一

喬知之

喬侃

員半千

任希古

蘇味道

杜審言

郭利貞

吳少微

富嘉謨

李福業

王適

李崇嗣

上官儀

字游韶陝州人上詩其詞綺錯婉媚及貴人效之曰上

官體

詠雪詩云禁園凝朔氣瑞雪掩晨曦花明棲鳳閣珠散  
影娥池飄素迎歌上翻花向舞移幸因千里映還繞萬  
年枝

又奉和山夜臨秋詩云殿帳清炎氣輦道含秋陰淒風  
移漢筑流水入虞琴雲飛送斷鴈月上淨疎林滴瀝露  
枝響空濛烟壑深

又和潁川公秋夜詩云沈寥空色遠芸黃淒序變涸浦

落導鴻長颺送巢鷺千林流夕景萬籟含宵轉峻雉聆  
金析層臺切銀箭

王昭君云玉關春色晚金河路幾千琴悲桂條上笛怨  
柳花前霧掩臨粧月風驚入鬢蟬裁書待迴使淚盡白  
雲天

高宗承貞觀之後天下無事儀獨持國政嘗凌晨入朝  
巡洛水堤步月徐轡詠詩曰脉脉廣川流驅馬歷長洲  
鵲飛山月曙蟬噪野風秋音韻清亮羣公望之猶神仙

馬

右古今詩話

高宗即位儀為相麟德元年坐梁王忠事下獄死武后惡之也儀應詔詩中用影娥池學士時無解其事祭酒令狐德棻召張柬之等十餘人示此詩柬之對云洞冥記漢武帝於望鵲臺西起俯月臺臺下穿影娥池每登臺眺月影入池中使宮人乘舟笑弄月影因名影娥池亦曰眺蟾臺令狐德棻嘆其博識

郭正一

定州人永隆中平章事武后專國出刺陝州與張楚金  
元萬頃皆為周興誣殺之

和太子納妃公主出降詩云桂宮初服冕蘭掖早升筭  
禮盛親迎晉聲芳出降齊金龜開瑞紐寶翟上仙桂轉  
扇承宵月揚旌照夕蜺

喬知之

知之馮翊人武后時為補闕

有綠珠篇云石家金谷重新聲明珠十斛買娉婷昔日

可憐君自許此時可喜得人情君家閨閣不曾闕好將  
歌舞借人看富貴英雄非分理驕奢勢力橫相干別君  
此去終不忍徒勞掩淚傷紅粉百年離別在高樓一旦  
紅顏為君盡蓋知之有寵婢曰碧玉知之為之不婚為  
武承嗣所奪知之以此歌寄之而末句云百年離別在  
高樓一旦紅顏為君盡寵者結於衣帶投井而死承嗣  
見詩大恨知之坐此陷亡

沈佺期贈知之古意云盧家少婦鬱金堂海燕雙棲玳



瑁梁九月寒砧催木葉十年征戍憶遼陽白狼河北音  
書斷丹鳳城南秋夜長誰為含愁獨不見更教明月照  
流黃

通鑑考異云唐歷及本紀殺知之在天授元年據陳子  
昂別傳云武攸宜討契丹子昂知之為參謀尚在萬歲  
通天元年子昂有西還至散關答知之詩云昔君事胡  
馬余得奉戎旃攜手同沙塞關河緬幽燕歎此南歸日  
猶聞北戍邊是時未罷也疑知之死在神功年後或天

授初承嗣銜之至是乃殺之耳

喬侃

人日登高云僕本多悲者年來不悟春登高一遊目始  
覺柳條新社陵猶識漢桃源不辨秦蹇若昇雲霧還似  
出囂塵賴得煙霞氣淹留攀桂人

沈佺期送喬隨州侃云結交三十載同遊一萬里情為  
契闊生心由離別死拜恩前後人從官差池起今爾歸  
漢東明珠報知己

侃武后時學士預修三教珠英知之之弟也開元初為  
兗州都督長安中卒於襄陽以文詞知名

員半千

隴右途中遭非語云趙有兩毛遂魯聞二曾參慈母猶  
且惑況在行路心冠冕無醜士賄賂成知己名利我所  
無清濁誰見理敝服空逢春緩帶不着身出遊非懷璧  
何憂乎忌人正須自保愛振衣出世塵

半千字榮期晉州人嘗事王義方義方曰五百歲一賢

者生子宜當之因改今名

始名餘慶

舉八科皆中累為弘文

館學士睿宗立召為太子右諭德表丐骸骨事五君有

清白節

與王勵路敬淳石抱中武后時同為弘文館學士

任希古

字敬臣棣州人五歲喪母七歲問父何以報母父曰揚名顯親可也乃立志從學年十六刺史崔樞欲舉秀才自以學未廣遜去後舉孝廉虞世南器其人為弘文學士終太子舍人

奉和太子納妃公主出降詩云帝子陞青陞王姬降紫  
宸星光移雜珮月彩薦重輪龍旌翻地杪鳳管颺天濱  
槐陰浮淺瀨葆吹翼輕塵

和長孫祕監伏日苦熱云玉署三時曉金羈五日歸北  
林開逸徑東閣敞閑扉池鏡分天色雲峯減日輝游鱗  
映荷聚驚翰遶林飛披襟楊子宅舒嘯仰重闈

和東觀羣賢七夕臨泛昆明云秋風始搖落秋水正澄  
鮮飛眺牽牛渚激賞鏤鯨川岸珠淪曉魄池灰歛曙煙

泛查分寫漢儀星別架天雲光波處動月影浪中懸驚  
鴻絳蒲弋游鯉入莊荃萍葉疑江上菱花似鏡前長林  
代輕幄細草即芳筵文峯開翠澈筆海控清漣不挹蘭  
樽聖空仰桂舟仙

薛元超求徽初為中書舍人薦希古郭正一王義方孟  
和貞崔融十餘人時論美之

蘇味道

趙州人與里人李嶠號蘇李武后時為相世號模稜手

上元云火樹銀花合星橋鐵鎖開暗塵隨馬去明月逐人來遊妓皆穠李行歌盡落梅金吾不禁夜玉漏莫相催

詠霧詩曰氤氲起洞壑遙裔匝平疇乍似含龍劍還疑映蜃樓拂林隨雨密度逕帶煙浮方謝公超步終從彥輔遊

又詠虹詩曰紆餘帶星渚窈窕架天潯空因壯士見還共美人沈逸照含良玉神光藻瑞金獨留長劍彩終負

昔賢心

贈封御史入臺詩云故事推三獨茲辰對兩闌夕鴉共  
鳴舞屈草接芳菲盛府題清索殊章動繡衣風連臺閣  
起霜就簡書飛凜凜當朝色行行滿路威惟當擊隼去  
復覩落鵬歸

又始背洛城秋郊矚目奉懷臺中諸侍御詩云薄遊忝  
霜署直指戒冰心荔浦方南紀蘅臯暫北臨山晴闕塞  
斷川暮廣城陰場圃通圭甸溝塍礙石林野童來捃拾



田叟去謳吟蟋蟀秋風起  
蕉葭晚露深帝城猶鬱鬱  
征傳幾駸駸迴憶披書地  
勞歌謝所欽

杜審言

和李大夫嗣真奉使存撫河東云六位乾坤動三微歷  
數遷謳歌移火德圖讖在金天子月開階統房星受命  
年禎符龍馬出寶籙鳳凰傳地即交風雨都仍卜澗瀍  
明堂惟御極清廟乃尊先不宰神功運無私大象懸八  
荒平物土四海接人煙已屬羣生泰猶言至道偏璽書

傍問俗旌節近推賢秩比司空位官臨御史員雄詞執  
刀筆直諫罷樓船國有大臣器朝加小會筵將行備禮  
樂送別仰神仙城闕周京轉關河陝服連稍觀汾水曲  
俄指絳臺前姑射聊長望平陽遂宛然舜耕餘草木禹  
鑿舊山川昔出諸侯靜無何霸業全中軍掃戰敵外府  
絕兵權隱隱帝鄉遠瞻瞻肅命虔西河偃風俗東壁挂  
星躔井邑粉榆社陵園松柏田榮光朝掩代佳氣曉侵  
燕雨霈鴻私滌風行睿旨宣惇嫠訪疾苦屠釣採貞堅

人樂逢刑措時康洽賞筵賜踰秦氏級恩倍漢家錢擁  
傳咸翹首稱觴競比肩拜迎彌道路舞詠溢郊鄩殺氣  
西衡白窮陰北土玄飛霜遙度海殘月迴臨邊緬邈朝  
廷問周流朔塞旋興來探馬策俊發抱龍泉學總八千  
卷文傾三百篇澄清得使者作頌有人焉未以崇班閔  
而云勝託捐偉材何磊落陋質幾翩翹江海寧為讓巴  
渝轉自牽一聞歌聖道助曲荷陶甄

和韋承慶過義陽公主山庄池五首野興城中發朝英

物外求情懸朱紱望契動赤城遊海鷺巢書閣山鷄舞  
畫樓雨餘清晚夏共坐北巖幽

逕轉危峰逼橋斜缺岸妨玉泉移酒味石髓換花香綰  
霧青條弱牽風紫蔓長猶言行樂少別向後池塘

携琴遶碧沙搖筆弄青霞杜若幽庭草芙蓉曲沼花宴  
遊成野客形勝得仙家往往留仙步登攀日易斜

攢石當軒倚懸泉度牖飛鹿麋銜妓席鶴子曳童衣園  
菓嘗難遍池蓮摘未稀卷簾先待月應在醉中歸

賞翫期他日高深愛此時池為八水背峯作九山疑池  
靜魚偏逸人閑鳥欲欺青溪留別興別與白雲期

贈崔融詩云十年俱薄宦萬里各他方雲天斷書札風  
土異炎涼太息幽蘭紫勞歌奇樹黃日疑懷叔度夜似  
憶真長北使從江表東歸在洛陽相逢慰疇昔相對叙  
存亡草深窮巷毀竹盡故園荒雅節君彌固衰顏余自  
傷人事盈虛改交游寵辱妨崔羅爭去翟鶴氅更尋王  
思極歡娛至朋情詎可忘速騎追佳賞城中及路傍琴

樽橫宴席巖沼卧詞場三川宿雨霽四月晚花芳復此  
開懸榻寧唯入後堂興酣鴈鵠舞言念鳳凰翔高選俄  
遷職嚴程已飭裝撫躬銜道義攜手戀輝光玉振先推  
美金銘舊所防勿嗟離別易行役共時康

贈蘇味道詩云北地寒應苦南庭戍不歸邊聲亂羌笛  
朔氣卷戎衣雨雪關山暗風霜草木稀敵兵戰欲盡漢  
卒尚重圍雲淨妖星落秋深塞馬肥據鞍雄劒動搖筆  
羽書飛輿駕還京邑朋遊滿帝畿方期來獻凱歌舞共

春輝

蓬萊三殿侍宴奉勅詠終南山應制詩云北斗掛城邊  
南山倚殿前雲標金闕迥樹杪玉堂懸半嶺通佳氣中  
峰繞瑞煙小臣持獻壽長此戴堯天

子美贈閻邱師詩云吾祖詩冠古同年蒙主恩謂審言  
以詩閻邱均以字同侍武后也

審言字必簡襄州人初貶吉州司戶與同僚不叶司馬  
周季重司戶郭若訥誣以罪繫獄審言子并年十三因

季重酢讌懷刃刺之季重臨死曰吾不知審言有孝子  
若訥誤我亦馬避害審言因此免官還東郭則天召將  
用之問曰卿喜否審言舞蹈謝恩因作惟喜詩授著作  
郎神龍初坐交通張易之流峯州入為修文館學士卒  
將死謂宋之問武平一曰吾在久壓公等今且死固大  
慰但恨不見替人云與李喬崔融蘇味道為文章四友  
審言卒李嶠已下請加命時武平一為表云審言譽鬱  
中朝文高前列是以升榮粉署擢秀蘭臺往以微瑕久



從遠謫陛下膺圖玉宸下制金門收賈誼於長沙返蔡邕於左校審言獲登文館預奉屬車未獻長卿之辭遽啟元瑜之兆臣等積薪增愧焚芝盈感伏乞恩加朱紱寵及幽泉假飾終之儀舉哀榮之典庶弊帷莫棄墜履無遺乃贈著作郎制曰漢覃恩祐方慶於同時漳浦疴疴忽歸於厚夜蒿里修文之地永閔音徽蓬山著作之曹宜加寵數

開階統漢覃字俱未詳

### 郭利貞

上元云九陌連燈影千門慶月華傾城出寶騎匝路轉  
香車爛熳唯愁曉周遊不問家更逢清管發處處落梅  
花

吳少微

和崔日用游開化寺詩云左憲多材雄故人尤驚鸚鵡護  
贈單于使休軺太原郭館次厭煩歌清懷尋寂寞西緣  
十里餘北上開化閣初入雲樹間冥蒙未昭廓漸出欄  
楸外萬里秋景焯歲晏風落山天寒水歸壑覽物頌幽

景三乘動玄鑰但數利解言永用忘昏著

少微新安人與富嘉謨齊名友善進士擢第累授晉陽尉與富嘉謨並拜監察御史時卧疾聞嘉謨亡號哭賦詩序曰維三月癸丑河南富嘉謨卒予時寢疾於洛陽北里聞之投枕而起淚霑乎衽席匍匐於寢門之外病不能哭仰天而呼曰天乎天乎俾予曷所朋曷可得而見乎賦詩曰吾友適不死於戲社稷臣直祿非造利長懷大庇人乃通承明籍遇此敦牂春藥厲其可畏皇穹

故匪仁疇昔與夫子孰云異天倫同病一相失茫茫不  
重陳子之文章在其殆尼父新鼓興幹河岳貞詞毒鬼  
神可悲不可朽車輶沒荒榛聖主賢為寶吁茲大國貧  
詞人莫不歎美既而病亟歎曰生死人之大分何恨焉  
然官職十分未作其一乃至是耶慷慨而終

少微為井州長史張仁亶進九鼎銘表其畧曰鼎者夏  
后氏作羣牧貢金遠方圖物備諸山澤以禦魑魅厥後  
嗣德昏亂鼎遷于商夏之寶也杞不足徵殷既有之又

患失之周德休明神寶不墜百代可繼伏惟陛下光大而當之若乃崇貴之器金玉之鼎鎔首山發睢上列太廟序明堂克明靈命以奉上帝非愚臣所敢議也

富嘉謨

明冰篇云北陸蒼茫河海凝南山闌干晝夜冰素彩峨峨明月升深山窮谷不自見安知採斲備嘉薦陰房涸涖掩寒扇陽春二月朝始暾春光潭沲度千門明冰時出御至尊彤庭赫赫九儀備腰玉煌煌千官事明冰畢

歲周在位憶昔沙朔寒風漲崑崙長河水始壯漫汗峻  
嶒積亭障嗷嗷鳴雁江上來禁苑池臺冰復開搖青涵  
綠映樓臺幽歌七月王風始鑿冰藏用昭物軌四時不  
忒千萬祀

嘉謨武功人長安中為晉陽尉吳少微者亦尉晉陽有  
魏倚谷者為太原主簿時稱北京三傑時天下文章尚  
徐庾浮俚不競嘉謨少微本經術雅厚雄邁人爭慕之  
號吳富體嘉謨終於右臺監察御史張說論其文曰如

孤峰絕岼壁立萬仞濃雲鬱興震雷俱發誠可畏也若  
施於廊廟駭矣

李福業

嶺外守歲詩云冬去更籌盡春隨斗柄迴寒暄一夜隔  
客鬢兩年催

福業調露二年登第後為御史五王誅二張亦與謀及  
誅

王適

幽州人終雍州司功參軍

詠江濱梅云忽見寒梅樹開花漢水濱不知春色早疑  
是弄珠人

陳子昂別傳云幽人王適見感遇詩曰是必為海內文  
宗矣

蜀中言懷云獨坐年將暮常懷志不通有時須問影無  
事則書空棄置如天外平生似夢中蓬心猶是客華髮  
欲成翁跡滯魂逾窘情垂路轉窮別離同夜月愁思隔



秋風老少悲顏叟盈虛悟翟公時來不可問何用求童  
蒙

李崇嗣

寒食絕句云普天皆滅焰匝地盡藏煙不知何處火來  
向客心然

覽鏡云歲去紅顏盡愁來白髮新今朝開鏡匝疑是逢  
故人

獨愁云聞道成都酒無錢亦可求不知將幾許銷得此

來愁

陳子昂題李三書齋云灼灼青春仲悠悠白日昇聲容  
何足恃榮各坐相矜願與金庭會將待玉書徵還丹應  
有術煙駕共君乘

又別李參軍詩云弦望如朝夕寧嗟蜀道行

又酬李參軍旅館見贈云昨夜銀河畔星文犯遙漢今  
朝紫氣新物色果逢真君從天上落乃是地僊人白璧  
疑宛楚烏裘似入秦摧藏多古意歷覽備艱辛樂廣雲

雖覩夷吾風未春鳳歌空有問龍性詎能馴寶劍終應  
出驪珠會見珍未及馮公老何驚孺子貧青雲儻可致  
北海憶孫賓皆與福業酬唱也

沈佺期黃口讚序云聖歷中有勅東觀修書黃口飛落  
鈎慙間奉宸主簿李崇嗣命采花哺之河東薛曜邀余  
為讚

唐詩紀事卷六

欽定四庫全書

唐詩紀事卷七

宋 計敏夫 撰

高正臣

崔知賢

韓仲宣

周彥昭

高球

弓嗣初

高瑾

王茂時

徐皓

長孫貞隱

高紹

郎餘令

陳嘉言

周彥輝

高嶠

周思鈞

劉友賢

于季子

東方虬

駱賓王

盧照隣

王勃

勳勳

楊炯

田遊巖

高正臣

晦日置酒林亭詩云正月符嘉節三春翫物華忘懷寄  
罇酒陶性狎山家柳翠含煙葉梅芳帶雪花光陰不相  
借遲遲落景斜

晦日重宴云芳辰重遊行乘景共追隨班荆陪舊識傾  
蓋得新知水葉分蓮沼風花落柳枝自符河朔趣寧羨  
高陽池

正臣廣平人官至衛尉卿習右軍書法睿宗最愛其筆

晦日宴高氏林亭凡二十一人皆以華字為韻子昂為之序曰有渤海之宗英是平陽之貴威發揮鳳臺而嘯侶幽贊鷄川而留宴又曰冠纓濟濟多延戚里之賓鸞鳳鏘鏘自有文雅之客

晦日重宴八人皆以池字為韻周彥暉為之序上元夜効小庾體詩六人以春字為韻長孫貞隱為之序

崔知賢

晦日林亭云上月河陽地芳辰景望華綿蠻變時鳥照

曜起春霞柳搖風處色梅散日前花淹留洛城晚歌吹  
石崇家

上元夜效小庾詩云今夜啟城闔結伴戲芳春鼓聲撩  
亂動風光觸處新月下多遊騎燈前饒看人歡樂無窮  
已歌舞達明晨

韓仲宣

晦日林亭云欲知行有樂芳樽對物華地接安仁縣園  
是季倫家柳處雲疑葉梅間雪似花日落歸途遠留與



伴煙霞

晦日重宴詩云鳳苑先吹晚龍樓夕照披陳遵已投轄  
山公正坐池落日催金奏飛霞送玉卮此時陪綺席不  
醉欲何為

上元夜効小庾體云他鄉月夜人相伴看燈輪光隨九  
華出影共百枝新歌鐘盛北里車馬沸南隣今宵何處  
好惟有洛城春

周彥昭

晦日林亭云勝地臨鷄浦高會偶龍沙御柳驚春色仙  
筇掩月華門邀千里馭杯泛九光霞日落山亭晚雷送  
七香車

高球

晦日林亭云溫洛年光早皇州景望華連鑣尋上路乘  
興入山家輕苔網危石春水架平沙賞極林塘暮處處  
起煙霞

弓嗣初

晦日林亭云上序春輝麗中園物候華高才盛文雅逸  
興滿煙霞參差金谷榭皎鏡碧塘沙蕭散林亭晚倒載  
欲還家

晦日重宴云年華藹芳隰春溜滿新池促賞依三友延  
歡寄一卮鳥聲隨管變花影逐風移行樂方無極淹留  
惜晚曦

嗣初咸亨二年第一人登第

高瑾

晦日林亭云試入山亭望言是石崇家二月風光起三  
春桃李華鶯吟上喬木鴈往息平沙相看會取醉寧知  
還路賒

晦日重宴云忽聞鶯響谷於此命相知正開彭澤酒來  
向高陽池柳葉風前弱梅花影處危賞洽林亭晚落照  
下參差

上元夜效小庾體云初年三五夜相知一兩人連鑣出  
巷口飛轂下池湄燈光恰似月人面併如春遨遊終未

已相歡待日輪

瑾士廡之孫登咸亨元年進士第

王茂時

晦日林亭云勝踐尋良會乘春翫物華還隨張放友來  
向石崇家止水分巖鏡開庭枕浦沙未極清泉賞參差  
落照斜

徐皓

晦日林亭云綺筵乘暇景瓊醕對年華門多金埒騎路

卷七  
引壁人車頻早猶藏葉梅殘正落花  
藹藹林亭晚餘興  
促流霞

長孫貞隱

晦日林亭云梅晚屬煙霞遨遊重歲華  
歌鐘雖戚里林藪是山家  
細雨猶開日深池不漲沙淹留迷處所  
巖岫幾重花

上元夜效小庾體詩云薄晚嘯遊人  
車馬亂驅塵月光  
三五夜燈燄一重春  
煙雲迷北闕簫管識南隣  
洛城終

不閉更出小平津

貞隱序上元之遊云九谷帝畿三川奧域交風均露上  
分朱鳥之躔沂洛背河下鎮蒼龍之闕多近臣之第宅  
即瞰銅街有貴戚之樓臺自連金穴美人競出錦幃如  
霞公子交馳雕鞍似月同遊洛浦疑尋稅馬之津爭渡  
河橋似向牽牛之渚寶昌年之樂事令節之佳遊者焉

高紹

晦日林亭云嘯侶入山家臨春翫物華葛絲調綠水桂

醕酌丹霞岬柳開新葉庭梅落早花興洽林亭晚方還  
倒載車

紹為考功郎中

郎餘令

晦日林亭云三春休晦節九谷泛年華半晴餘細雨全  
晚澹殘霞樽開踈竹葉管應落梅花興闌相顧起流水  
送香車

餘令定州人博學擢第授霍王元軌府參軍事從父知



年亦為王友元軌每曰郎家二賢皆入府不意培塿而  
松栢為林也改著作郎卒

餘令善畫唐秘書省內落星石薛稷畫鶴賀知章草書  
餘令鳳相傳為四絕元和中韓公武為校書郎挾彈中  
鶴一眼乃謂之五絕

陳嘉言

晦日林亭云公子申敬愛携朋翫物華人是平陽客地  
即石崇家水文生舊浦風色滿新花日暮連歸騎長川

照晚霞

晦日重宴云高門引冠蓋下客抱支離綺席珍羞滿文  
場藻翰摛萸華彫上月柳色鵲春池日斜歸戚里連騎  
勒金羈

上元夜效小庾體云今夜可憐春河橋多麗人寶馬金  
為絡香車玉作輪連手窺潘掾分頭看洛神重城自不  
掩出向小平津

武后時酷吏也中宗神龍中詔酷吏陳嘉言等其身已

死自垂拱已來枉濫殺人有官者並令削奪開元中御史程行謏奏酷吏來子均等二十三人情狀尤重子孫不許與官陳嘉言魚承曄皇甫文備傳遊藝四人情狀稍輕子孫不許近任

周彥輝

晦日林亭云砌  
莫收晦魄津柳競年華  
既狎忘筌友方淹投轄車  
綺筵迴舞雪瓊醕泛流霞  
雲低上天晚絲雨帶風斜

晦日重宴云春華歸柳岸晦景落蓂枝置驛銅街右開  
筵玉浦陸林煙含障密竹雨帶珠危興闌巾倒戴山公  
下習池

彥輝登咸亨五年進士

高嶠

晦日林亭云飛觀寫春望開宴坐汀沙積溜含苔色晴  
空蕩日華歌入平陽第舞對石崇家莫慮能騎馬投轄  
自停車

晦日重宴云駕言尋鳳侶乘歡俯鴈池班荆逢舊識斟  
桂喜深知紫蘭方出逕黃鶯未嚙枝別有陶春日青天  
雲霧披

嶠為司門郎中

周思鈞

北門學士思茂之弟也武后時為太子文學劉禕之賜  
死在獄上疏自陳臨誅洗沐神色自若自捉筆為表詞  
懇哀到思鈞悵嘆其文后惡之貶揚州司倉參軍

和高氏林亭晦日文宴云早春驚柳穠初晦掩冀華騎  
出平陽里筵開衛尉家竹影含雲密池紋帶雨斜重惜  
林亭晚上路滿煙霞

重宴又云綺筵乘晦景高宴下陽池濯雨梅香散含風  
柳色移輕塵依扇落流水入絃危勿顧林亭晚方歡雲  
霧披

思鈞以中書舍人卒子瑛為單父令瑛以女適武就生  
靖安丞相元衡

劉友賢

晦日林亭云春來日漸賒  
琴酒逐年華欲向丈通徑先  
游武子家池碧新流滿巖紅  
落照斜興闌情未極步步  
惜風花

已上並高氏林亭之客外陳子昂張錫王勔解琬各載  
其門

于季子

詠漢高祖云百戰方夷項三章且代秦功歸蕭相國氣

盡戚夫人

詠雲詩云瑞雲千里映祥輝四望新隨風亂鳥足汎水  
結魚鱗布葉疑臨夏開花詎待春願得承嘉景無令掩  
桂輪

季子登咸亨進士第

東方虬

詠春雪云春雪滿空來觸處似花開不知園裏樹若箇  
是真梅



陳子昂寄東方左史修竹篇序云文章道弊五百年矣  
漢魏風骨晉宋莫傳然而文獻有可證者常觀齊梁詩  
彩麗競繁而興寄都絕每以永嘆昨見明公孤桐篇骨  
氣端翔音韻頓挫光英明韻有金石聲遂用洗心收視  
發揮幽鬱不圖正始之音復覩於茲

虬武后時為左史嘗曰百年後可與西門豹作對

### 駱賓王

帝京篇云山河千里國城闕九重門不覩皇居壯安知

天子尊皇居帝里峻函谷鶡野龍山侯甸服五緯連影  
集星躔八水分流橫地軸秦塞重關一百二漢家離宮  
三十六桂殿陰岑對玉樓椒房窈窕連金屋三條九陌  
麗城隈萬戶千門平旦開複道斜通鵲觀交衢直指  
鳳凰臺劍履南宮入簪纓北闕來聲明冠裳宇文物象  
昭回鈎陳肅蘭彫壁沼浮槐市銅羽應風迴金莖承露  
起校文天祿閣習戰昆明水朱邸枕平臺黃扉通戚里  
平臺戚里帶崇墉炊金饌玉待鳴鐘小堂綺帳三千戶

大道青樓十二重，寶蓋彫鞍金絡馬。蘭窓繡柱玉盤龍，  
綺柱璇題粉壁映鎔金。鳴玉王侯盛，王侯貴人多近臣。  
朝遊北里暮南鄰，陸賈分金將燕喜。陳遵投轄尚留賓，  
趙李經過密蕭朱。交結親丹鳳，朱城白日暮。青巾繡幘，  
紅塵度俠客。珠彈垂楊道，倡婦銀鈎采桑路。倡家桃李，  
自芳菲。京華遊俠盛，輕肥延年女弟雙。飛入羅敷使君，  
千騎歸同心。結縷帶連理，織成衣。春朝桂樽樽百味，秋  
夜蘭燈燈九微。翠幌珠簾不獨映，清歌寶瑟自相依。且

論三萬八千是寧知四十九年非古來榮利若浮雲人  
生倚伏信難分始見田竇相移奪俄聞衛霍有功勲未  
厭金陵氣先開石櫛文朱門無復張公子灞亭誰畏李  
將軍相顧百齡皆有待居然萬化咸應改桂枝芳氣已  
銷亡栢梁高宴今何在莫矜一旦擅豪華自言千載長  
驕奢倏忽搏風生羽翼湏臾失浪委泥沙黃雀徒巢桂  
青門遂種瓜黃金銷鑠素絲變一貴一賤交情見紅顏  
宿昔白頭新脫粟布衣輕故人故人有湮淪新知無意

氣灰死韓安國羅傷翟廷尉已矣哉歸去來馬卿辭蜀  
多文藻揚雄仕漢之良媒三冬自矜誠足用十年不調  
幾遭迴汲黯新逾積孫弘閤未開誰惜長沙傅獨負洛  
陽才

世稱王楊盧駱楊盈川之為文好以古人姓名連用如  
張平子之略談陸士衡之所記潘安仁宜其陋矣仲長  
統何足知之號為點鬼簿賓王文好以數對如秦地重  
關一百二漢家離宮三十六人號為筭博士帝京篇曰

倏忽搏風生羽翼  
須臾失浪委泥沙  
賓王後與徐敬業  
興兵揚州大敗逃死此其識也

宋之問貶黜放還至江南遊靈隱寺夜月極明長廊行  
吟曰鷺嶺鬱岵嶢龍宮鏤寂寥  
句未屬有老僧點長明  
燈問曰少年夜久不寐何耶之問曰適偶欲題此寺而  
興思不屬僧請吟上聯即曰何不云樓觀滄海日門對  
浙江潮之問愕然訝其適麗又續終篇曰桂子月中落  
天香雲外飄  
捫羅登塔遠剝木取泉遙  
霜薄花更發冰

輕葉互凋待入天台路看余渡石橋遲明更訪之則不復見矣寺僧有知者曰此賓王也

詠月云忌滿光先缺乘昏影暫流既能明似鏡何用曲如鉤

賓王義烏人七歲能賦詩武后時數上疏言事除臨海丞鞅鞅不得志棄官去徐敬業亂以為府屬敬業為檄武后罪后讀但嘻笑至一杯之土未乾六尺之孤安在矍然曰誰為之或以賓王對后曰宰相安得失此人敬

業敗亡命不知所之中宗時詔求其文得數百篇

賓王七歲詠鷺云鷺鷥曲項向天歌白毛浮渌水紅掌撥清波

盧照隣

結交少年場云長安重遊俠洛陽富才雄玉劍浮雲騎  
金鞭明月弓關鷄通渭北走馬向關東孫賓遙見待郭  
解暗相通不受千金爵誰論萬里功將軍下天上虜騎  
入雲中烽火夜似月兵氣曉成虹橫行徇知己負羽遠



征戎龍旌昏朔霧鳥陣卷寒風追奔瀚海咽戰罷陰山  
空歸來謝天子何如馬上翁

詠史云昔有平陵男姓朱名阿游直髮上衝冠壯氣橫  
三秋願請斬馬劍先斷佞臣頭天子玉檻折將軍丹血  
流捐生不肯拜視死其若休歸來教鄉里童蒙遠相求  
弟子數百人散在十二州三公不敢吏五鹿何能誨名  
與日月懸義與天壤儔何必疲執戟區區在封侯偉哉  
曠達士知命固不憂

季生昔未達身辱功不成髡鉗為臺隸灌園變姓名幸  
逢滕將軍兼遇曹邱生漢祖廣招納一朝拜公卿百金  
孰為重一諾良匪輕廷議斬樊噲羣公寂無聲處身孤  
且直遭時坦而平丈夫當如此唯唯何足榮

大漢昔云季小人道遂振玉帛委閭尹斧鑕嬰搢紳邈  
哉郭先生卷舒得其真雍容謝朝廷譚笑獎人倫在晦  
不絕俗處亂不為親諸侯不得友天子不得臣冲情甄  
負甌重價折角巾悠悠天下士相送洛橋津誰知仙舟

上寂寂無四隣

公業負奇志交結盡才雄良田四百頃所食常不充一  
為侍御史慷慨說何公何公何為敗吾謀適不同仲穎  
恣殘忍廢興良在躬死人如亂麻天子如轉蓬干戈及  
黃屋荊棘生紫宮鄭生運其謀將以清國戎時來命不  
遂脫身歸山東凜凜千載下穆如懷清風

元日述懷云筮仕無中秩歸耕有外臣人歌小歲酒花  
舞大唐春草色薰三徑風光動四隣願得長如此年年

物候新

七夕泛舟云汀葭肅徂暑江樹起初涼水疑通織室舟  
似泛仙潢連橈渡急響鳴棹下浮光日晚菱歌唱風煙  
滿夕陽

鳳杼秋期至鳬舟野望開微吟翠塘側延想白雲隈石  
似支機罷查疑犯宿來天潢殊漫漫日暮獨悠哉

照隣字昇之范陽人調新都尉病去官足攣一手又廢  
乃居具茨山下自以為高宗尚吏已獨儒武后尚法已

獨黃老后封嵩山屢聘賢士已獨廢著五悲文以自明  
病既久與親屬訣自沈潁水

王勃 勔 勳

裴行儉在吏部見蘇味道王勳曰二君後皆掌銓衡李  
敬玄盛稱王勃楊炯盧照隣賂賓王行儉曰勃等雖有  
才然浮躁銜露豈享爵祿者炯頗沉默可至今長餘皆  
不得其死

勔晦日宴高氏林亭詩云上序披林館中京視物華竹

窻低露葉梅逕起風花景落春臺霧池侵舊渚沙綺筵  
歌吹晚暮雨泛香車

勃為文先磨墨數升引被覆面而卧忽起書之初不加  
點時謂腹藁滕王閣記落霞孤鶩之語至今稱之其詩  
甚多如畫棟朝飛南浦雲珠簾暮捲西山雨上巳云綠  
齊山葉滿紅曳片芝銷九日云蘭氣添新酌花香染別  
衣又詠風云肅肅涼景生加我林壑清驅煙入洞戶卷  
霧出山楹去來固無跡動息如有情日落山水靜為君

起松聲最有餘味真天才也

勅開元中任中書舍人先是五王出閣同日受冊有司  
忘載冊文百官在列方知闕禮勅召五吏執管授一時  
俱畢

勅為沛王府修撰時諸王鬪鷄勅戲為文檄英王鷄高  
宗曰是且交構斥出府勅既廢客劍南嘗登葛嶺山曠  
望慨然思諸葛之功賦詩見情為虢州參軍坐罪除名  
父福時以左遷交趾令勅往省度海溺水瘁而死年二

十九勦勦以事坐誅

楊炯

夜送趙縱云趙氏連城壁由來天下傳送君還舊府明月滿秦川

張燕公贈別盈川箴云杳杳深谷森森喬木天與之才或鮮其祿君服六藝道德為尊君居百里風化之源才勿驕恠政勿苛煩明神是福而小人不寬畏其不畏存其不存作誥茲酒成敗之根勒銘其口禍福之門雖有



韶夏勿棄擊轅豈無車馬敢贈一言

炯華陰人永隆二年皇太子已釋奠求豪俊充崇文館  
學士後為盈川令說以箴贈行戒其苛至官果以嚴酷  
稱不為人所多卒官中宗時贈著作郎

### 田遊巖

遊巖云宏農清巖曲有磐石可坐宋十一每拂拭待余  
寄詩贈之云信彼稱靈石居然狎遁棲徘徊承翠巘斌  
駁帶深溪夕陰起層岫清景半虹蜺風來應嘯阮波渡

可琴嵇僕也潁陽客望彼空思齊儻見山人至簪蒿且杖藜

宋之問答云家臨清溪水溪水繞磐石綠蘿四面垂裊裊百餘尺風泉度絲管苔蘚鋪茵席傳聞潁陽人霞外漱靈液忽枉巖中翰吟卧復朝夕何當遂遠遊物外候逋客

遊巖京兆人隱箕山高宗幸嵩山遣薛元超就問其母帝親至其門帝曰先生比佳否答曰臣所謂泉石膏肓

煙霞痼疾者勅赴都拜崇文館學士進太子洗馬裴炎  
死坐素厚善放還山

唐詩紀事卷七

欽定四庫全書

唐詩紀事卷八

宋 計敏夫 撰

陳子昂

邵大震

李日知

李景伯

劉禕之

王無競

袁恕已

郭元振

崔融

張昌齡

陳子昂

字伯玉梓州人資褊躁然好施予篤朋友與陸餘慶王  
無競房融崔泰之盧藏用趙元最厚唐興文章承徐庾

餘風子昂始變雅正為感遇詩三十八篇王適曰是必為海內文宗

子昂趙貞固盧藏用杜審言宋之問畢隆澤郭襲微司馬承禎釋懷一陸餘慶號方外十友

盧黃門藏用曰道喪五百歲而得陳君

顏真卿曰若激昂顏俗雖無害

於過正權其中論不亦傷於厚誣與沈隱侯論謝康樂靈均以來此秘未覩同也

開寶中梓州

刺史郭廷謂以詩哭之略曰魄逐東流水墳依獨坐山退之薦士詩曰國朝盛文章子昂始高蹈黃門侍郎盧

藏用祭文曰天之生也珠圓流兮玉方潔子之歿也太  
山顏兮良玉折士林閒寂兮人物踈門館蕭條兮賓侶  
絕嘆佳城之不返辭玉階而長別嗚呼置酒祭子子不  
顧亢聲哭子子不迴唯天道而無託但無心而已摧

獨異記載子昂初入京不為人知有賣胡琴者價百萬  
豪貴傳視無辨者子昂突出謂左右曰輦千緡市之衆  
驚問答曰余善此樂皆曰可得聞乎曰明日可集宣揚  
里如期偕往則酒肴畢具置胡琴於前食畢捧琴語曰

蜀人陳子昂有文百軸馳走京轂碌碌塵土不為人知  
此樂賤工之役豈宜留心舉而碎之以其文軸遍贈會  
者一日之內聲華溢郡時武攸宜為建安王辟為書記  
感遇詩云微月生西海幽陽始代昇圓光正東滿陰魄  
已朝凝太極生天地三元更廢興至精諒斯在三五誰  
能徵其一

蘭若生春夏芊蔚何青青幽獨空林色朱蕤冒紫莖遲  
遲白日晚嫋嫋秋風生歲華盡搖落芳意竟何成其二



蒼蒼丁零塞今古緬荒途亭堠何摧兀暴骨無全軀黃  
沙漠南起白日隱西隅漢甲三十萬曾以事匈奴但見  
沙場死誰憐塞上孤

其三

樂羊為魏將食子殉軍功骨肉且相薄他人安得忠吾  
聞山中相乃屬放麕翁孤獸猶不忍況以奉君終

其四

市人矜巧智於道若童蒙傾奪相夸侈不知身所終曷  
見玄真子觀世玉壺中杳然遺天地乘化入無窮

其五

吾觀龍變化乃知至陽精石林何冥密幽洞無留行古

之得仙道信與元化并玄感非象識誰能測淪冥世人

拘目見酣酒笑丹經崑崙有瑤樹安得采其英

其六

白日每不歸青陽時暮矣茫茫吾何思林卧觀無始衆

芳委時晦鵲鳩悲鳴耳鴻荒古已頽誰識巢居子

其七

吾觀崑崙化日月淪洞冥精魄相交會天壤以羅生仲

尼推太極老聃貴窈冥西方金仙子崇議乃無明空色

皆寂滅業緣定何成名教信紛藉死生俱未停

其八

聖人秘元命懼世亂其真如何嵩公輩詆譎誤時人先

天誠為美階亂禍誰因長城備敵國羸禍發其親赤精

既迷漢子年何救秦去去桃李花多言死如麻

其九

深居觀群動怵然爭朶頤群動相啖食利害紛嘒嘒便  
便夸毗子榮耀更相持務光讓天下商賈競刀錐已矣

行采芝萬世同一時

其十

吾愛鬼谷子青谿無垢氛囊括經世道遺身在白雲七  
雄方龍闔天下亂無君浮榮不足貴遵養晦時文舒可  
彌宇宙卷之不足分豈徒山水壽空與麋鹿群

其十一

呦呦南山鹿離罟以媒罔招搖青桂樹幽蠹亦成科世  
情甘近習榮耀紛如何怨憎未相復親愛生禍羅瑶臺  
傾巧笑玉杯殞雙娥誰見枯城蘖青青成斧柯十二

林居病時久水木澹孤清閑卧觀物化悠悠念無生青

春始萌達朱火已滿盈殂落方自此感歎何時平十三

臨岐泣世道天命良悠悠昔日殷王子玉馬遂朝周寶

鼎淪伊穀瑶臺成古邱西山傷遺老東陵有故侯十四

貴人難得意賞愛在須臾莫以心如玉探他明月珠昔

稱天桃子今為春市徒鴟鴞悲東國麋鹿泣姑蘇誰見

鴟夷子扁舟去五湖

其十五

聖人去已久公道緬良難蚩蚩夸毗子堯禹以為謾  
榮貴工巧勢利迭相干燕王尊樂毅分國願同歡魯連  
讓齊爵遺組去邯鄲伊人信往矣感激為誰歎

十六

幽居觀天運悠悠念群生終古代興沒豪聖莫能爭  
三季淪周赧七雄滅秦嬴復聞赤精子提劍入咸京炎光  
既無象晉魏紛縱橫堯禹道已昧昏虐勢方行豈無當

世雄天道與邊兵咄咄安可言時醉而未醒仲尼溺東

夏伯陽遁西溟大運自古來旅人胡歎哉

十七

逶迤世已久骨鯁道斯窮豈無感激者時俗頽此風灌

園何其鄙皎皎於陵子世道不相容嗟嗟張長公

十八

聖人不利己憂濟在元元黃屋非堯意瑤臺安可論吾

聞西方化清淨道彌敦奈何窮金玉彫刻以為尊雲架

山林盡瑤圖珠翠煩鬼功尚未可人力安能存夸愚適

增累矜智道逾昏

十九

玄天幽且默群議曷咄咄聖人教猶在世運久陵遲一  
繩將何繫憂醉不能持去去行采芝勿為塵所欺

二十

蜻蛉遊天下與世本無患飛飛未能止黃雀來相干穰  
侯富秦寵金石比交歡出入咸陽裏諸侯莫敢言寧知

山東客激怒秦王肝布衣取丞相千載為辛酸

二十

微霜知歲晏斧柯始青青況乃金天久浩露霑群英登  
山望宇宙白日已西暝雲海方蕩潏孤鱗安得寧

二十

翡翠巢南海雄雌珠樹林何知美人意驕愛比黃金殺

身炎洲裏委羽玉堂陰  
旖旎光首飾歲蕤爛錦衾豈不

在遐遠虞羅忽見尋  
多材信為累歎息比珍禽

二十  
三

挈餅者誰子姣服當青春  
三五明月滿盈華不自珍高

坐委金玉微縷懸千鈞  
如何負公鼎被敎笑時人

二十  
四

寒蟬號白露茲歲已蹉跎  
群物從大化孤英將奈何瑤

臺有青鳥遠食玉山禾  
崑崙見玄鳳豈復虞雲羅

二十  
五

荒哉穆天子始與白雲期  
宮女多怨曠層城閉峨眉日

晚瑤臺樂豈傷桃李時  
青苔空萎絕白髮生羅帷

二十  
六



朝發宜都渚浩然思故鄉故鄉不可見但見巫山陽巫  
山彩雲沒高邱正微茫佇立望已久涕淚霑衣裳豈茲  
越鄉感憶昔楚襄王朝雲無處所荆國亦淪亡

二十  
七

昔日章華宴荆王樂荒淫霓旌翠羽蓋射兕雲夢林竭  
來高唐觀悵望陽雲岑雄圖今何在黃雀空哀吟

二十  
八

丁亥歲云暮西山事甲兵羸糧市邛道荷戟爭羗城嚴  
冬陰風勁窮岫油雲生昏黷無晝夜羽檄復相驚拳跼  
競萬仞崩危走九冥籍籍峰壑裏哀哀冰雪行聖人御

宇宙聞道太階平肉食謀何失藜藿緬縱橫

二十九

可惜瑤臺樹灼灼佳人姿碧華映朱實攀折青春時豈  
不盛光寵榮君白玉墀但恨紅芳歇凋傷感所思

三十

竭來豪遊子勢利禍之門如何蘭膏歎感激自生冤衆  
趨明所避時棄道猶存雲淵既已失羅網與誰論箕山  
有高節湘水有清源唯應白鷗鳥可為洗心言

三十一

索居猶幾日炎夏忽然衰陽彩皆陰翳親友盡睽違登  
山望不見涕泣久連沍宿昔感顏色若與白雲期世中

驕豪子驅逐正嗤嗤蜀山與楚水攜手在何時

三十  
二

金鼎合神丹世人將見欺飛飛騎羊子胡乃在峨眉變  
化固幽類芳菲能幾時疲痾苦淪世憂瘁日侵淄眷然

顧幽褐白雪空涕洟

其三十

朔風吹海樹蕭條邊已秋亭上誰家子哀哀明月樓自  
言幽燕客結髮事遠遊赤丸殺公吏白刃報私讎避仇  
至海上被役此邊州故鄉三千里遼水復悠悠每憤邊  
兵入常為漢國羞何知七十載白首未封侯

四十

本為貴公子平生實愛才感時思報國拔劍起蒿萊西  
馳丁零塞北上單于臺登山見千里懷古心悠哉誰言

未忘禍磨沒成塵埃

其三十  
十五

浩然坐何慕吾蜀有峨眉念與楚狂子悠悠白雲期時  
哉悲不會涕泣久漣沔夢登西山冗南采巫江芝探元  
觀造化遺世從雲螭婉孌時永矣感悟不見之

其三十六

朝入雲中郡北望單于臺二國何密邇沙朔氣雄哉藉  
藉天驕子猖狂已復來塞垣無名將亭堠空崔嵬咄嗟

吾何歎邊人塗草萊

其三  
十七

仲尼探元化幽鴻順陽和大運自盈縮春秋遞來過盲  
飈忽號怒萬物相紛劇溟海皆震蕩孤鳳其如何

其三  
十八

### 邵大震

九日登玄武山旅眺云九月九日望遙空秋水秋天生  
夕風寒鴈一向南飛遠遊人幾度菊花叢

盧照隣和云九月九日眺山川歸心歸望積風煙他鄉  
共酌金花酒萬里同悲鴻鴈天

玄武山在今東蜀高宗時王勃以檄鷄文斥出沛王府  
既廢客劍南有遊玄武山賦詩照隣為新都尉大震其  
同時人也

勃詩云九月九日望鄉臺他席他鄉送客杯人今已厭  
南中苦鴻鴈那從北地來

李日知

鄭州人景龍初為相初安樂公主館第成中宗臨幸燕  
從官賦詩日知卒章曰所願但知居者樂無使時稱作

者勞獨以規誠睿宗他日謂曰嚮時雖朕亦不敢諫非

卿亮直何能爾即拜侍郎

亮直唐書本傳作挺直

### 李景伯

中宗宰相懷遠之子景龍初為諫議大夫中宗宴侍臣  
酒酣各命為迴波辭景伯獨為箴規語帝不悅蕭至忠  
曰真諫官也

迴波辭曰迴波爾時酒卮微臣職在箴規侍宴既過三  
爵喧譁竊恐非宜

劉禕之

字希美常州人與孟利貞高智周郭正一俱有名號劉  
孟高郭上元中與元萬頃等偕名入禁中論次新書高  
宗又密與參決時政以分宰相權時謂北門學士武后  
時以罪賜死

九成宮秋初應制詩云玄圃疏金闕仙臺駐玉鑾野分  
仙鷲岫路接寶鷄壇林樹千霜積山宮四序寒蟬急知  
秋早鶯踈覺夏闌怡神紫氣外凝睇白雲端舜海詞波



發空驚游聖難

和太子納妃公主出降詩曰夢梓光青陞穠桃藹紫宮  
德優宸念遠禮備國姻崇萬戶聲明發三條騎吹通香  
輪送重景綵旆引仙虹

奉和別越王詩云周屏辭金殿梁驂整玉珂管聲依折  
柳琴韻動流波鶴蓋分陰促龍軒別念多延襟小山路  
還起大風歌

王無競

字仲列宋太尉弘之裔氣豪縱下筆成章為殿中侍御史張易之等誅坐嘗交貶廣州仇家矯制榜殺之巫山詩云神女向高唐巫山下夕陽徘徊作行雨婉孌逐荆王電影江前落雷聲峽外長霽雲無處所臺館曉蒼蒼宋之問下山歌云下嵩邱兮多所思携佳人兮步遲遲松間明月長如此君再遊兮復何時

無競和云日云暮兮下嵩山路連綿兮樹石間出谷口兮見明月心徘徊兮不能還

袁恕已

詠屏風云綺閣雲霞滿芳林草樹新鳥驚疑欲曙花笑  
不關春山對彈琴客溪流垂釣人請看車馬客行處有  
風塵

恕已滄州人與誅二張相中宗及貶周利正逼殺之

郭元振

古劍歌云君不見昆吾鐵冶飛炎煙紅光紫氣俱赫然  
良工鍛鍊凡幾年鑄得寶劍名龍泉龍泉顏色如霜雪

良工嗟咨歎奇絕瑠璃玉匣吐蓮花錯鏤金環生明月  
正逢天下無風塵幸得周防君子身精光黯黯青蛇色  
文章片片綠龜鱗非直結交遊俠子亦曾親近英雄人  
何言中路遭棄捐零落飄淪古獄邊雖復沉埋無所用  
猶能夜夜氣衝天

漢

子美過代公故宅詩云壯公臨事斷  
顧步涕橫落高詠寶劍篇神交付溟

元振尉通泉任俠使氣撥去小節武后知所為名欲詰  
既與語奇之索所為文章上寶劍篇后覽嘉嘆詔示學

士李嶠等

久戍人將老長征馬不肥元振警句也元振嘗山居夜  
有人面如盤出燈下元振以此詩題其頰遂滅明日出  
行巨木上有白耳此句在馬

元振魏州人年十六與薛稷趙彥昭同為大學生姿雄  
邁景雲中位宰相

崔融

融字成安齊州人擢八科高第與李嶠蘇味道王紹宗

附易之兄弟杜審言為融所獎引為服總麻子禹錫翹  
知名孫巨曾孫從

和宋之問寒食題黃梅臨江驛云春分自淮北寒食渡  
江南忽見潯陽水疑是宋家潭明主闔難叫孤臣逐未  
堪遙思故園陌桃李正酣酣

宋之問詩云馬上逢寒食愁中屬暮春可憐江浦望不  
見洛橋人北極懷明主南溟作逐臣故園腸斷處日夜  
柳條新

戶部尚書崔公挽歌云八座圖書委三臺章奏盈舉杯  
常有勸曳履忽無聲市若荊州罷池如薛縣平空餘濟  
南劍天子署高名

詠劍詩云寶劍出昆吾龜龍夾采珠五精初獻術千戶  
競論都匣氣衝牛斗山形轉轆轤欲知天下貴持此問  
風胡

則天皇后挽歌云前殿臨朝罷長陵合葬歸山川不可  
望文物盡成非陰月靈中道軒星落太微空餘天子孝

松上景雲飛

韋長史挽詞云日落桑榆下寒生松柏中冥冥多苦霧  
切切有悲風京兆新阡闕扶陽甲第空郭門從此送荆  
棘漸蒙籠

崔融瓦松賦序曰崇文館瓦松者產于屋雷之下謂之  
木也訪山客而未詳謂之草也驗神農而罕記賦云煌  
煌特秀狀金芝之產雷歷歷虛懸若星榆之種天葩條  
郁毓根柢連卷間紫苔而裊露凌碧瓦而含煙又曰慙




魏宮之烏悲惡漢殿之紅蓮崔公博學莫不該悉豈不  
知瓦松已有舊說乎博雅云在屋曰昔邪在墻曰垣衣  
廣志謂之香生於久屋之瓦魏明帝好之命長安西載  
其瓦於洛陽以覆屋前代詞人詩中多用昔邪梁簡文  
詠薔薇曰緣堦覆碧倚依簷映昔邪或言屋上木多松  
栽土木氣洩則瓦松生出酉陽雜俎烏悲字未詳  
久視元年改控鶴府為奉宸府張易之為奉宸令引詞  
人為供奉佞者奏云昌宗王子晉後身今被羽衣吹簫

乘木鶴奏樂於庭融賦詩為絕唱有昔遇浮邱伯今同  
丁令威中郎才貌是藏史姓名非之句後與宰相蘇味  
道相諄云某詩所以不及相公無銀花合也蘇有詩云  
火樹銀花合味道云子詩雖無銀花合還有金銅丁取  
令威之句也

融為文華婉當時未有輩者朝廷大筆多手敕委之譔  
武后哀冊最高麗絕筆而死時謂思若神竭云

張昌齡

冀州人與兄昌宗皆能文昌齡舉進士與王公治齊名  
皆為考功王師旦所絀太宗問之荅曰昌齡等華而少  
實其文浮靡非令器也取之則後生勸慕亂陛下風雅  
帝然之後獻翠微宮頌敕於通事舍人裏洪奉賀蘭敏  
之奏豫北門修撰卒南部新書云昌齡與文皇作息兵  
詔嘆曰禰衡潘岳之儔也



唐詩紀事卷八

欽定四庫全書

集部

唐詩紀事卷九

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚熾

謄錄貢生臣李璜

謄錄舉人臣潘炯

欽定四庫全書

唐詩紀事卷九

宋 計敏夫 撰

李適

張錫

徐彥伯

宗楚客

韋承慶

蕭至忠

李迥秀

劉憲

崔湜

岑羲

李適

適字子至京兆人武后修三教珠英以李嶠張昌宗為  
使取文學士綴集適與王無競尹元凱等在選睿宗時

以工部侍郎卒

九日登慈恩應制云鳳輦乘朝霽鸚鵡林對晚秋天文貝  
葉寫聖澤菊花浮塔似神功造龕疑佛影留幸陪清漢  
蹕欣奉淨居遊

答宋十一崖口五渡見贈云聞君訪遠山躋險造幽絕  
眇然青雲境觀奇彌年月登嶺亦沂溪孤舟事公越寧  
嶂傳彩翠嵯磴互欹缺石林上攢叢金澗下明滅捫壁  
窺丹井梯苔瞰乳穴忽枉巖中贈對翫未嘗輟殷勤獨

往事委曲鍊藥說邀余名山期從爾泛海蒞歲晏秉宿  
心斯言匪徒說

初中宗景龍二年始於修文館置大學士四員學士八  
員直學士十二員象四時八節十二月於是李嶠宗楚  
客趙彥昭韋嗣立為大學士適劉憲崔湜鄭愔盧藏用  
李乂岑羲劉子玄為學士薛稷馬懷素宋之問武平一  
杜審言沈佺期閻朝隱為直學士又召徐堅韋元旦徐  
彥伯劉允濟等滿員其後被選者不一凡天子饗會游



豫唯宰相直學士得從春幸梨園並渭水祓除則賜柳  
園辟癘夏宴蒲萄園賜朱櫻秋登慈恩浮圖獻菊花酒  
稱壽冬幸新豐歷白鹿觀上驪山賜浴湯池給香粉蘭  
澤從行給翔麟馬品官黃衣各一帝有所感即賦詩學  
士皆屬和當時人所欽慕然皆狎猥佻倖忘君臣禮法  
惟以文華取幸若韋元旦劉允濟沈佺期宋之問閻朝  
隱等無它稱景龍二年七夕御兩儀殿賦詩李嶠獻詩  
云唯言七襄詠流入五絃歌

是日李行言  
唱步虛歌

九月幸慈恩

寺塔上官氏獻詩群臣並賦閏九月幸總持登浮圖李  
嶠等獻詩十月三日幸三會寺十一月十五日中宗誕  
辰內殿連句為栢梁體二十一日安樂公主出降武延  
秀是月以婕妤上官為昭容十二月六日上幸薦福寺  
鄭愔詩先成舊邸三乘  
閩是也宋之問後進駕象法王  
歸是也立春侍

宴賦詩二十一日幸臨渭亭李嶠等應制三十日幸長

安故城十二月晦諸學士入閣守歲以皇后乳母戲適

御史大夫竇從一

往來其家遂  
有國爹之號

三年七日清暉閣登高

遇雪宗楚客詩云蓬萊雪作山是也因賜金綵人勝李

嶠等七言詩

千鍾聖酒御筵披是也

是日甚懽上令學士遞起屢

舞至沈佺期賦迴波有齒錄牙緋之語晦日幸昆明池

宋之問詩自有夜珠來之句至今傳之二月八日送沙

門元奘等歸荊州李嶠等賦詩十一日幸太平公主南

庄七月幸望春宮送朔方節度使張亶赴軍八月三日

幸安樂公主西庄九月九日幸臨渭亭分韻賦詩

韋安石先

成十一月一日安樂公主入新宅賦詩十五日中宗誕

辰長寧公主滿月李嶠詩神龍見像日仙鳳養雛年是也二十三日南郊徐彥伯上南郊賦十二月十二日幸溫泉宮勅蒲州刺史徐彥伯入仗同學士例因與武平一等五人獻詩上官昭容獻七言絕句三首十四日幸韋嗣立庄拜嗣立逍遙公名其居曰清虛原幽栖谷十五日幸白鹿觀十八日幸秦始皇陵四年正月朔賜群臣栢樹五日蓬萊宮宴吐蕃使因為栢梁體吐蕃舍人亦賦七  
日重宴大明殿賜綵鏤人勝又觀打毬八日立春賜綵

花二十九日晦幸漣水二月一日送金城公主三日幸  
司農少卿王光輔庄是夕岑羲設茗飲討論經史武平  
一論春秋崔日用請北面日用贈平一歌曰彼名流兮  
左氏癖意玄遠兮冠今昔二十一日張亶至自朔方宴  
于桃花園賦七言詩明日宴承慶殿李嶠桃花園詞因  
號桃花行三月一日清明幸梨園命侍臣為拔河之戲  
三日上巳被楔於渭濱賦七言詩賜細柳園八日令學  
士尋勝同宴於禮部尚書竇希琳亭賦詩張說為之序

十一日宴於昭容之別院二十七日李嶠入都祔廟徐  
彥伯等餞之賦詩四月一日幸長寧公主庄六日幸興  
慶池觀競渡之戲其日過希玠宅學士賦詩二十九日  
御宴祝欽明為八風舞諸學士曰祝公斯舉五經掃地  
盡矣睿宗時道士司馬承禎還天台適贈詩詞甚美朝  
士屬和三百餘人徐彥伯編為白雲記

中宗幸興慶戲競渡應制云拂霧金輿丹旆轉凌晨  
謁帳碧池開南山倒影從雲落北澗搖光寫浪迴急舸爭

標排行度輕帆截浦觸荷來橫汾宴鎬歡無極歌舞年  
年聖壽盃

陪幸臨渭亭詩云長樂喜春歸披香愛雪霏花從銀閣  
度絮繞玉窓飛寫曜銜天藻呈祥拂御衣山林紛可望  
無處不光輝

安樂公主山庄云平陽金勝鳳凰樓沁水銀河鸚鵡洲  
綵仗遙尋丹壑裏仙輿暫幸綠亭幽前池錦幔蓮花艷  
後嶺香爐桂藥秋貴主稱觴萬年壽還輕漢武濟汾遊

人日大明宮應制云朱城待鳳韶華至碧殿乘龍淑氣  
來寶帳金屏人已帖圖花學鳥勝初裁林香近接宜春  
苑山翠遙添獻壽杯向夕憑高風日麗天文垂曜象昭  
回

望春宮迎春應制云玉輦金輿天上來花園四望錦屏  
開輕絲半拂朱城柳細纈全披畫閣梅舞蝶分行飄御  
席歌鶯度曲繞仙盃聖詞春光輝滿漢主秋風莫道  
才



送金城公主云絳河從遠聘青海赴和親月作臨邊曉  
花為度隴春主歌悲顧鶴帝策重安人獨有瓊簫去悠  
悠思錦輪

宴安樂公主新宅云銀河半倚鳳凰臺玉酒相傳鸚鵡  
杯若見君平須借問仙槎一去幾時來

錢唐永昌赴任東都云聞道飛鳬向洛陽翩翩矯翮度

文昌

自尚書  
郎為令

因聲寄意三花樹少室崑崙前幾過香

適云  
有田

在少室不  
見十年矣

徐元伯題適碑陰序曰  
謔謔李公生自號東山子死葬  
東山豈其識哉神交者歌薤露以送子歸東山焉歌曰  
隴障縈紫氣金光赫赫氤氲美人含遙靄桃李方自薰  
圖高黃鶴羽寶奪驪龍群忽驚薤上曲掩暄東山雲回也  
實天枉賈生亦晚促今復哀若人危迅風前燭夜臺淪  
清鏡窮塵埋結綵何以贈下泉生芻唯一束

張錫

慈恩寺九月九日登浮圖應制云九州霜景淨千門曉

望通仙遊光御路瑞塔迥凌空菊彩揚堯日萸香遶舜  
風天文麗辰象竊抃仰層穹

晦日宴高文學林亭云雪盡銅駝路花照石崇家年光  
開柳色池影汎雲華賞洽情方遠春歸景未賒欲知多  
暇日罇酒漬澄霞

錫文琮之子也父視初代其甥李嶠為宰相請還廬陵  
王不為張易之所右俄知選坐賊論流循州韋后臨朝  
為相旬日出刺絳州卒

徐彥伯

兗州人為蒲州司軍兵叅時司戶韋曷善判司士李亘  
工書彥伯屬辭號河東三絕武后撰三教珠英取文辭  
士皆天下選彥伯嶠居首

和宋之問岷口五渡云聞有獨徃客拂衣捐世心結忻  
薄枉渚撰念榮舊林經亘去岷合冥綿歸壑深琪樹環  
碧彩金潭生翠陰洄沿弄沙榜危仄眺明岑夕聞桂裏  
猿曉翫松上禽雜珮蘊孤袖瓊敷綴雙衿我懷滄洲想

懿爾白雪吟秉願理方叶存期跡易尋茲言庶不負為  
報巖中琴

贈劉舍人古意云深林閟靈鳥文章世所希巢君碧梧  
樹舞君青瑣闌或言鳳池樂撫翼更西飛鳳池環禁林  
仙閣霧沉沉璇題激沅日珠綴綿清陰郁穆絃言重熒  
煌台座深風張丹祀翮月弄紫庭音還彩結不散孤英  
跂莫尋浩歌向蘭渚婉孌故儔心

和韋元旦早朝云夕轉清壺漏晨驚長樂鐘逶迤綸禁

客假寐守銅龍予亦趨三殿肩隨謁九重繁珂接曙響  
華釵比春容相問韶光歇彌憐芳意濃願言乘日盱眙  
手即雲峰

袞襖渭濱侍宴應制云晴風麗日滿芳洲御幕春筵袞  
錦流皆言曲侍璜溪宴暫似輕飛天漢遊

侍宴韋嗣立庄云鼎臣休澣隙方外結遙心別業青霞  
境孤潭碧樹林每馳東野策遙弄北溪琴帝眷紆時豫  
台園賞歲陰移鑾明月沼張組白雲岑御酒瑤觴落仙

壇竹徑深三光懸聖藻五等冠朝簪自昔皇恩感咸言  
獨自今

送金城公主云鳳宸憐簫曲鸞闈念掌珍苑庭遥築館  
廟策重和親星轉銀河夕花移玉樹春聖心懷遠送留  
蹕望征塵

駕幸溫泉云姬典歌時邁虞編記省方何如黑帝月玄  
覽白雲鄉翠仗縈船岼明旂應萑音負玉草也陽風揺花眊

彩雲艷寶戈芒御陌開油次離宮夾樹行桂枝籠驪褱

松葉蔭堂皇，仙女舍珠液。溫池孕璧房，湧疑神瀉溢。泛  
若帝臺漿，獨沸流常熱。潛蒸氣轉香，青壇環玉甃。紅淀  
鑠金光，藻曜凝芳潔。歲蕤獻淑祥，五龍歸寶箒。九鳳叶  
時康，同預華封老。中衢祝聖皇。

安樂公主新宅云鳳樓開闔引明光，花耐連添醉益香。

或云金珂玉柱  
或云金柯玉柱

欲知帝女薰天貴，金柯玉柱夜成行。

錢唐永昌云金谿碧水玉潭砂，鳬鳥翩翩弄日華。鬪鷄

香陌行春倦，為摘東園桃李花。



錢唐州高使君云香萼媚紅滋垂條紫綠絲情人拂瑤  
袂共惜此芳時驕驥已躑躅鳥隼方葳蕤跂聞望太守  
流潤及京師

中宗幸興慶池戲競渡獻詩曰夾道傳呼翊翠虬天廻  
日轉御芳洲青潭曉靄籠仙蹕紅嶼晴花隔綵旒香溢  
金杯盈廣坐聲搖妓舸匝中流群臣相慶嘉魚樂共哂  
橫汾歌吹秋

中宗與修文館學士宴樂賦詩每命彥伯為之序文彩

華綈夜宴安樂公主新第序云言容有典緝如幄之柔  
規湯沐增榮結風庭之藻渙又曰鳴璜節珮登繡軸之  
瑊軒花綬香纓帶澤壺之青鑠此言駙馬送鄭惟忠序云卷  
蘆葉而橫吹聲愁隴月撫劒鐔而直視目斷芳洲

彥伯為文多變易求新以鳳閣為鸚閣龍門為虬戶金  
谷為銑溪玉山為瓊岳竹馬為篠驂月兔為魄兔進士  
効之謂之徐湓體

### 宗楚客

正月晦中宗幸漣水詩云御輦出明光乘流泛羽觴珠  
胎隨月減玉漏與年長寒盡梅猶白風遲柳未黃日斜  
旌騎轉休氣滿林塘

人日清暉閣應制云窈窕神仙閣參差雲漢間九重中  
禁啓七日早春還太液天為水蓬萊雪作山今朝上林  
樹無處不堪攀

幸安樂公主西園應制詩玉樓銀榜枕嚴城翠蓋虹旗  
列禁庭日映層巘圖畫色風搖雜樹管絃聲水邊重閣

含飛動雲裏孤峰似削成幸陪七聖遊崑閬無勞萬里  
訪蓬瀛

又安樂公主入新宅詩云星橋他日創仙榜此時開馬  
向鋪錢埒簫聞弄玉臺人疑衛叔美客似長卿才借問  
遊天漢誰能取石迴

楚客字叔敖河東人節愍太子之敗也楚客請誅其首  
祭三思俄為相與紀處訥締交世號宗紀御史崔琬劾  
之帝詔琬與宗紀兄弟兩解之世謂帝為和事天子韋

氏敗被誅

韋承慶

字延休性謹畏長安中為相附張易之時與異母弟嗣立並為宰相韋氏孝友詞學則承慶嗣立遽音樂有萬石達禮儀則叔夏史才博識有述時趙冬曦兄弟亦各有名張說曰韋趙兄弟人之杞梓

寒食應制詩云鳳城春色晚龍禁早輝通舊火收槐燧餘寒入桂宮鶯啼正隱葉鷄鬪始開籠藹藹瑤山滿仙

歌始樂風

直中書省詩清切鳳凰池扶踈鷄樹枝惟應集鸞鷟何  
為宿羈雌大造乾坤闢深恩雨露垂昆蚊既含養鴛鴦  
亦驅馳木偶翻為用芝泥忽濫窺九思空自勉五字本  
無施徒喜逢千載何階答二儀螢光向日盡蚊力負山  
疲禁宇庭除閑閑宵鐘箭移暗花臨戶發殘月下簾欹  
白髮隨身改丹心為主披命將時並泰言與行俱危寄  
謝巢由客堯年正在斯

南中詠鴈云萬里人南去三秋鴈北飛不知何歲月得  
與爾同歸

凌朝浮江旅思云天晴上初日春水送孤舟山遠疑無  
樹潮平似不流岼花榮且落江鳥沒還浮羈望傷千里  
長歌遣客愁

蕭至忠

安樂公主山庄云西郊窈窕鳳凰臺北渚平明法駕來  
匝地金聲初度曲周堂玉溜始傳杯灣路分遊畫舟轉

巖門相向碧亭開  
微臣此時承宴樂  
髣髴疑從星漢迴  
九日侍宴應制云  
望幸三秋暮登高  
九日初朱旗巡漢  
苑翠帟俯秦墟  
寵極萸香遍恩深  
菊酎餘承懽何以  
答  
萬億俯宸居

得餘字

慈恩寺九日登塔應制云  
天蹕三乘啓星輿  
六轡行登  
高臨寶塔極目遍  
王城神衛虛中遶  
仙歌雲外清重陽  
千萬壽率舞頌昇平

至忠德言孫相中宗後從太平公主逆謀誅明皇曰至



忠誠國器但晚謬耳

李迥秀

慈恩寺九日應制云沙界人王塔金繩梵帝遊言從祇  
樹賞行翫菊叢秋御酒調甘露天花亂綵旒堯年持佛  
日同此慶時休

和主弟錫宴云金榜宮堯雲裏開玉簫參差天際迴莫  
驚側弁還歸路祇為平陽歌舞催

安樂公主山庄云詰旦重門聞警蹕傳言太主奏山林

是日迴輿羅萬騎此時歡甚賜千金鷺羽鳳簫參樂曲  
荻園竹徑接帷陰手舞足蹈方無已萬年千歲奉薰琴  
迥秀崔湜鄭愔在武后中宗時以姦淫汙名位然皆有  
文迥秀嘗以鴛鴦一雙與張易之共飲取其常相逐也  
迥秀為兵部尚書有疾謂問者曰僕自知當作侍中有  
命固不憂也問者出門而終詔贈侍中

劉憲

送張亶赴朔方應制云命將擇耆年圖功勝必全光輝

萬乘餞威武二庭宣中衢橫鼓角曠野蔽旌旃推食天  
厨至投醪御酒傳涼風過鴈苑殺氣下鷄田分閭恩何  
極臨岐動膚篇

陪幸長寧公主林亭庄云公主林亭地清晨降玉輿畫  
橋飛渡水仙閣涌臨虛晴新看蛺蝶夏早摘芙蕖文酒  
娛遊盛忻叨侍從餘

陪幸五王宅云北斗樞機任西京肺腑親疇昔王門下  
今茲制幸晨恩光山水被聖作管絃新遶座薰紅藥當

軒暗綠筠摘荷纔早夏聽鳥尚餘春行漏今徒晚風煙  
起觀津

三會寺應制云岵嵒蒼史臺敞朗紺園開戒旦壺人警  
翻霜羽騎來下輦登三襲塞旒望九垓林披館陶勝水  
浸昆明灰網戶飛花綴幡竿度鳥迴豫遊仙唱動瀟洒  
出塵埃

薦福寺應制云地靈傳景福天駕儼鉤陳佳哉藩邸舊  
赫矣梵宮新香塔魚山下禪堂鴈水濱珠幡映白日鏡

殿寫青春甚懼延故吏大覺拯生人幸承歌頌末長奉  
屬車塵

陪遊上苑遇雪云龍驂曉入望春宮正逢春雪舞春風  
花光併在天文上寒氣行銷御酒中

賜剪綵花應制云上林宮館好春心獨早知剪花疑始  
發刻燕似新窺色濃輕雪點香淺嫩風吹此日叨陪侍  
恩榮得數枝

人日清暉閣應制云輿輦乘人日登臨上鳳京風尋歌

曲颺雪向舞行縈千官隨興合百福與時并承恩長若  
此微賤幸昇平

安樂公主山庄云主家別墅帝城隈無勞海上覓蓬萊  
沓嶂懸流平地起危樓曲閣半天開庭莎作薦舞行出  
浦樹相將歌棹迴此日風光與形勝祇言併伴聖詞來  
侍宴韋嗣立庄云東山有謝安枉道鳴和鑾緹騎紛初  
日霓旌度曉寒雲蹕巘間下虹橋澗底盤幽棲俄似屆  
聖矚宛餘觀嵯懸飛溜直岸轉綠潭寬桂華堯酒泛松

響舜絃彈明主恩斯極賢臣節更殫不才叨侍從詠德  
以濡翰

白鹿觀應制云玄遊乘落暉仙宇曖霏微石梁縈澗轉  
珠旒掃壇飛芝童薦膏液松鶴舞駢駢還似瑤池上歌  
成周馭歸

人日翫雪應制云勝日登臨雲葉起芳風搖蕩雪花飛  
星暉幸得承金鏡颺影還將奉玉衣

送金城公主云外館踰河右行營指路岐和親悲遠嫁

忍愛泣將離旌旆  
羗風引軒車漢月隨  
那堪馬上曲時  
向管中吹

興慶池應制云蒼龍闕下天泉池  
軒駕來遊簫管吹綠  
堤夏篠紫不散冒水新荷卷復披  
帳殿疑從畫裏出樓  
船直在鏡中移自然東海神仙處  
何用西崑轍迹疲  
宴安樂公主新宅云層軒洞戶旦  
新披度曲飛觴夜不  
疲綺綴玲瓏河色曉珠簾隱映月華窺

錢唐永昌云始見郎官拜洛陽  
旋聞近侍發雕章緒言



已最暮年政綺字當生滿路光

七夕應制云秋吹過雙闕星仙動二靈更深移月鏡河  
淺度雲輶殿上呼方朔人間失武丁天文茲夜裏光映  
紫微庭

慈恩寺九日應制云香塔曾霄半仙鑱淨鏡遊登臨憑  
季月寥廓見中州御酒新寒退天文寶氣浮却邪將獻  
壽茲日奉千秋

人日侍宴大明宮應制云禁苑韶華此日歸東郊道上

轉青旂柳色梅芳何處所  
風前雪裏覓芳菲  
開水池內魚新躍  
剪綵花間鶯始飛  
欲識王遊達  
陽氣為觀天藻競春輝

奉和三日被袂渭濱云  
桃花欲落柳條長  
沙頭水上足風光  
此時御蹕來遊處  
願奉年年被袂觴

奉和春幸望春宮應制  
云暮春春色最便妍  
苑裏花開列御筵  
商山積翠臨城起  
滄水浮光共幕連  
鶯藏嫩葉歌相喚  
蝶礙芳叢舞不前  
歡娛節物今如此  
願奉宸遊

億萬年

憲字元度宋州人為中書舍人坐善張易之出刺渝州  
召為太僕少卿兼修文館學士卒天授中治來俊臣獄  
疾其酷欲痛繩之反為所陷明皇在東宮憲啓曰褚無  
量經明行脩耆年宿望宜數召問以察其言太子順納

崔湜

白鹿觀應制云御旗探紫籙仙仗闢丹邱捧藥芝童下  
焚香桂女留鸞歌無歲月鶴語記春秋臣朔其何幸常

陪漢武遊

送金城公主云懷我前冊備降女舊姻脩簫鼓辭家怨  
旌旃出塞愁尚孩中念切方遠御慈留顧乏謀臣用仍  
勞聖主憂

餞唐州高使君云芳春桃李時京都物華好為岳豈不  
貴所悲陟遠道遠道不可思宿昔夢見之贈君雙佩刀  
日夕視來期

慈恩寺九日應制云帝里重陽節香園萬乘來却邪莫

結珮獻壽菊傳杯塔類承天湧門疑待佛開睿詞懸日  
月長得仰昭回

立春內出綵花應制云澹蕩春光滿曉空逍遙御輦入  
離宮山河眺望雲天外臺榭參差煙霧中庭際花飛錦  
繡合枝間鳥轉管絃同即此歡娛齊醵宴唯應率舞樂  
薰風

婕妤怨云不分君恩斷新粧視鏡中容華向春日嬌愛  
似秋風枕席臨燈曉屏幃向月空年年後庭樹榮落在

深宮

秦州薛都督挽詞云十里絳山幽千年汾水流碑傳門  
客建劔是故人留壠樹煙含夕山門月照秋古來鐘鼎  
盛共盡一蒿邱

湜仁師之子弟澄液從兄涖並有文翰列居清要每私  
宴自比王謝之家謂人曰吾門戶及出身歷官未嘗不  
為第一丈夫當先據要路以制人豈能默默受制於人  
故進取不已而不以令終湜執政時年三十六嘗暮出

端門下天津馬上賦詩曰春還上林苑花滿洛陽城張  
說見之嘆曰文與位固可致其年不可及也

湜字澄瀾以文詞稱附韋后作相又附太平公主門下  
客獻海鷗賦以諷湜稱善而不自悛帝誅蕭至忠湜流  
嶺外後知湜本謀賜死荊州

岑羲

安樂公主山庄云銀榜重樓出霧開金輿步輦向天來  
泉聲迴入吹簫曲山勢遙臨獻壽杯帝女含笑流飛電

乾文動色象昭回誠願北極拱堯日微臣抃舞詠康哉  
宴安樂公主新宅云金榜重樓開夜扉瓊筵愛客未言  
歸御歡不覺銀河曙盡醉那知玉露晞

餞唐州高使君云蒼茫南塞地明媚上春時目極傷千  
里懷君不自持征車別岐路斜日下崦嵫一歎輶軒阻  
悠悠即所思

慈恩寺九日應制云寶臺聳天外玉輦步雲端日麗重  
陽景風搖季月寒梵堂遙集鴈帝樂近翔鸞願獻延齡



酒長承湛露歡

立春內出綵花應制云和風助律應韶年清蹕乘高入  
望仙花笑鶯歌迎帝輦雲披日霽俯皇川南山近獻仙  
杯上北斗平臨御座前一奉恩榮歡在鎬空知率舞聽  
薰絃

義字伯華初為金壇令弟仲翔長洲令仲休溧水令宗  
楚客語本道巡察御史曰母遺江東三峯後相中宗睿  
宗坐預太平公主謀誅始岑氏在清要者數十人義曰

物極則反亦可以懼矣然不能抑退以及禍

唐詩紀事卷九